



**India-i atsü-anemra Pakistan-ia
atsü-anemtsü**

**Kolkata Camp atema coach Manolo
team nung Chhetri-a densema lir**

VOL. XXII ISSUE NO. 203 (ADOK 203)

DIMAPUR

YANGTEPNÜ (THURSDAY)

MONUPII (MAY) 08, 2025

₹ 5.00

India-i 'Operation Sindoor' kübok Pakistan nung kiralongrar tesem 9 amak

New Delhi, May 7, 2025 (Agencies): Bodbarnep züngia India-i Pakistan aser Pakistan-Occupied Kashmir (POK) kübok tesem 9 nung cruise missile strikes 24 tashi süogo.

'Operation Sindoor' kübok airstrike ajanga Jaish-e-Mohammed, Lashkar-e-Taiba, aser Hizbul Mujahideen kiralongrar 80 tema tepsetogo ta osang angazüker.

Taoba ita Jammu and Kashmir kübok Pahalgam nung kiralongrartemi tourist 26 khasetba atema India-i iba mapa inyak.

Tanep India-i Pakistan nung Muzaffarabad, Kotli, Bahawalpur, Rawalakot, Chakswari, Bhimber, Neelum Valley, Jhelum, aser Chakwal amak aser item ya kiralongrartem aliba tongti tesemtem lir.

India-i Lashkar-e-Taiba (LeT) aser Jaish-e-Mohammad (LeT) amala kiralongraba teloktem indang teseptem nung cruise missiles khaloktsü.

Defence osang ajanga tesem 9 indang temetetsü lemsatepba: 1. *Markaz Subhan Allah, Jaish-e-Mohammad (JeM), Bahawalpur, Punjab, Pakistan*

Markaz Subhan Allah ya National Highway-5 (Karachi-

Torkham Highway) nung lir. Bahawalpur nung ali acre 15 nung yangluba aliba Markaz ya JeM indang main training centre lir.

Iba markaz ya JeM indang operational headquarter lir aser February 14, 2019 nü Pulwama suicide bombing attack tasa atongertem den sendaktepa lir.

Iba markaz nung JeM tanishisang Maulana Masood Azhar, de-facto JeM chief Mufti Abdul Rauf Asghar, Maulana Ammar nung kinungertem alir.

JeM-i Markaz Subhan Allah nung arms, physical aser religious training agir.

2. *Markaz Taiba, Lashkar-e-Taiba, Muridke, Punjab*

Markaz Taiba ya 2000 küm yanglu aser iba ya LeT atema tongtipang training centre ka lir. Nangal Sahdan nung ali acre 82 nung yanglua aliba Markaz nung madrassas, market, residential area, sports facility, fish farm aser agricultural tracts lir.

Iba complex nung arms aser physical training facilities lir aser dawa'h (inviting people to Islam) ta ser outreach activity inyaker. Iba markaz nung Sufa academy ka lir aser iba ajanga tebur kiralongrartem nem tesayuba agütsür aser tetsürtem asoshi

Sufa education centre balaka lir. LeT aser JuD ajanga iba tesem nung mapang shia training agir. Iba markaz nung mosque aser guesthouse ka yanglutsü atema 2000 küm Osama bin Laden-i Rs 10 million agüja liasü.

Pakistan nung Inter-Services Intelligence (ISI)-i tetuyuba agüja 26/11 Mumbai amakertem iba centre nung training agüja liasü.

3. *Sarjal/Tehra Kalan facility, Jaish-e-Mohammad, Shakargarh, Narowal District, Punjab, Pakistan*

Iba facility ya JeM atema Jammu and Kashmir telungi yoktsü atema launching site tongtiba lir. Iba facility ya primary health centre ka nung miimbanga yanglua lir aser ISI-i International Border aser Line of Control (LoC) anasa ibala launch facilities yangluba nung yaritepa arur.

Iba JeM facility ya International Border nungi kilometer 6 dang pilar lir aser Jammu and Kashmir kübok Samba sector anasa dang lir.

ISI aser JeM ajanga Shakargarh nung tunnels network ka yanglua lir aser International Border nung Arnia-Jammu sector nung yanglua

aliba tunnels ajak ya iba facility nung alirtemi yangluba.

4. *Mehmooona Joya Facility, Hizbul Mujahideen (HM), Head Marala, Sialkot*

Iba facility ya Hizbul Mujahideen (HM) meyong lir aser Kotli Bhutta Government Hospital anasa lir.

Iba facility nung HM züngsemtem training agütsür aser Jammu region telungi yoker.

5. *Markaz Ahle Hadith Barnala, Lashkar-e-Taiba, Bhimber District, Pakistan-Occupied Jammu and Kashmir (PoJK)*

Iba centre ya PoJK nung LeT indang tongtipang tesem ka lir aser iba nungi Poonch-Rajouri-Reasi sector telungi LeT kiralongrar aser prangpong-injang bener yoker.

Markaz Ahle Hadith nung kiralongrar 100 -150 shi litetter aser LeT kiralongrartem indang staging centre ka ama amshir.

6. *Markaz Abbas, Jaish-e-Mohammad, Kotli*

Iba Markaz ya Kotli Military Camp nungi kilometre 2 dang pilar lir aser iba facility nung JeM kiralongrar 100-125 shi alir.

7. *Maskar Raheel Shahid, Hizbul-Mujahideen, Kotli, PoJK*

Iba ya Hizbul Mujahideen (HM) indang facility tejentem

rongnung ka lir. Iba kidang kiralongrartem mejangba takdang, prangpong-injang ayuba takdang pezü, office amala lir.

8. *Shawai Nallah Camp, Lashkar-e-Taiba, Muzaffarabad, PoJK*

Iba ya LeT atema tongtipang teseptem rongnung ka lir aser recruitment, registration aser training atema amshir. Iba tesepe ya 2000 nungi lapoka benshia arur. Iba dang Huzaifa Bin Yemen aser Bait-ul-Mujahideen camp ta-a ajar aser firing range, training ground, LeT madrassa, aser takdang 40 lir.

9. *Syedna Bilal Markaz, Jaish-e-Mohammad, Muzaffarabad, PoJK*

Iba ya PoJK nung JeM atema main centre lir aser Muzaffarabad nung Red Fort den anasa lir. Iba nung JeM office aser transit camp lir aser JeM indang charity wing Al-Rehmat Trust office dena lir.

JeM kiralongrartem Jammu and Kashmir-i meyokdang iba facility ya transit camp ka ama benshir. Iba tesem nungsa Pakistani Special Forces, SSG ajanga training talila agütsür aser iba ya JeM kiralongrartem indang phone nung aliba noksatem ajanga kuli agütsür.

Sambit Patra-i Manipur MLA 21 den majurutep ao

Imphal, May 7, 2025 (Agencies): Bharatiya Janata Party (BJP) Northeast in-charge Sambit Patra-i anogo ananü Manipur semdang ogo saka pai sorkar tasen ka akümtsü atema shidi züluba MLA 21 den majurutep.

Patra-i Manipur nung amungdang taoba Chief Minister N Biren Singh, Speaker Th Satyabrata, aser Governor Ajay Kumar Bhalla nung den ajurutepa liasü.

Taoba Chief Minister N Biren Singh-i menden nungi sodi agiba sülen Manipur nung February 13 nungi President's Rule benoka lir.

Patra-i anogo anabuba amungdang Kangpokpi nung MLA Nemcha Kipgen den ajurutepa senden ka amen. Union Territory ama ketdangsübaren balaka meshia zülurtem rongnung Kipgen dena lir.

Iba mapang Patra-isa Committee on Tribal Unity (CoTU) aser Kuki Women's Union nungi teshimtet nübotem den ajurutep.

CoTU-i Patra nem Kuki-Zo nung tebilemtsütem züluba memorandum ka agütsü.

Iba memorandum nungsa 'separate administration' ka meshia akhangba nenshia lir. Parnokisa tribal areas kümzüka ayutsü atema Article 371C aser Fifth o Sixth Schedules kübok parnok kümzüka ayutsü takhangba agütsü.

CoTU-isa memorandum nung tribal land rights agizüktsü aser Manipur kübok tanga tesem ajaklen Armed Forces (Special Powers) Act benoktsü takhangba agütsü.

Patra-i Mongulbarnü Kangpokpi nung tajurutsüpur ajuruba sülen Imphal-i meypa aru aser New Delhi-i apusoa ao.

metetdaktsüogo.

Saisapongertemi June 30, 2025 matongdang bangdak Association ajanga Directorate office dangi achievement certificates yoktsüla. Iba anogo sülen aruba applications magizüktsü ta Department-i ashi.

YR&S dept-i saisapongertem tenüng meshir

Dimapur, May 7, 2025 (TYO): April 2024 nungi March 2025 tsüngda North - East Level, National Level aser International Level nung medals anguba saisapongertem tenüng meshir ta Department of Youth Resources and Sports, Nagaland-i

Nagaland nung 'Operation Abhiyas' mock drill agiogo



Kohima, May 7, 2025 (TYO): Bodbarnü Nagaland nung 'Operation Abhiyas' nung shilem ka ama mock drill kanga junga agiogo.

Ministry of Home Affairs-i linük ajungalen mock drill agitsü tetuyuba agütsüba ama Nagaland kübok district 17 nungi 10 nung agiogo.

Tanü nikongdang 4:00 ako nungi Dimapur, Kohima, Mokokchung, Wokha, Zunheboto, Mon, Phek, Tuensang, Kiphire, aser Peren district tem nung mock drill agi.

Kohima nung Nagaland Public Service Commission office nung airstrike indang mock drill ka agia liasü. Iba mapang emergency sirens asaten aser

mock casualties 10, den nisung ka asba indang drill ai ta Kohima Deputy Commissioner B. Henok Buchem-i ashi.

Iba drill nung responders-i emergency procedures kanga junga inyak. Iba atema Directorate of Social Welfare nung temporary hospital ka aser Directorate of Higher Education nung demilitarised (safe) zone ka amenok aser main staging area ji Capital Convention Centre liasü ta DC Buchem-isa ashi.

Iba sentong nung civil administration, police, medical teams, Home Guards, Civil Supplies Department, NCC cadets, aser Assam Rifles personnel aden.

"Airstrike tensa ka ajurura

agency balalai koba tashi renema lir ta asadangtsü atema nukjidadong yur iba mock drill agi. Department ajak amalitep tajung lia shilem agiogo" ta Deputy Commissioner-i ashi.

Tanüngba district headquarters 9 nung iba mesükba emergency drills agi aser iba nung air raids, sirens, aser 6:30 ako nung minute ishika atema blackout measures inyaka liasü.

Tanga district tem nung building fires, search & rescue operations, casualty evacuation from damaged buildings, temporary hospital setups, aser evacuation of civilians to bunkers & demilitarised zones indang mock drills agi ta ketdangsür kati ashi.

Mokokchung DC Thsuvise Phojo den tepila sentong agi Mokokchung DC tasen Ajit Kumar Verma IAS aruogo



Mokokchung, 07 May (TYO): Mokokchung Deputy Commissioner, Thsuvise Phojo NCS den tepila sentong yangi DC conference hall nung temenungratsüka agiogo. Pa ya Mokokchung nung DC küm ka sür ita 11 aser anogo 5 inyaker Department of Personnel & Administrative Reforms nung Joint Secretary inyaksü aor. Pa melenä Mokokchung Deputy Commissioner tasen Ajit Kumar Verma IAS aruogo.

Iba sentong nung Mokokchung district nung aliba HoD-tem, sub-division aser administrative circle nungi administrator-tem, Ao Senden-i anir mulungtet balala, GB association, Mokokchung Municipal Council aser ano telok balalai pa nem tetushi agüja senpet balala agi senpettsü.

Thsuvise Phojo-i tepila o jembidang, Mokokchung nungi legislator 10 den Dimapur nungi Aor legislator ka aser Nagaland Lok Sabha MP shiba iba district nungi lir, parnok ajak den par külem administrator-tem, staff-tem, HoDs (state & central), Sr. SP-i anir police ajak, CSO-tem, IRCS, BSG, ano lokti balala aser Mokokchung nüburtemi nungitba den temeim mapa agi yaria aküm aser shisatsü

agütsüba ajanga kecha mesenseni tasü itta inyakogo, ta telok temang dang pelaba metetdaksü.

"Ni kecha balaka meinyak saka tanü nenoki ni yamai tushiba ya kü dak malangba ka lir", ta ashi. "Ni kechi inyakogo, ibaji nenok ajungba ajanga lir, nenok mapa tajungji kü dak angurba lir", ta pai shisem. Meimchir dang asünung shinga tabensaba mali, anungji, tashimait mesüra metokmeperi kar danga inyaka lira tatok agütsütsü asoshi paisa mepishi.

Pa EAC kümer mezüng posting-ji Mangkolemba nung liasü, aser district nungbo tang DC inyakba ya tatembang asütsüa akok, anungji, "ni ya kanga tia taka officer rongnung ka asütsü aser nenok temeim aser anepaluba ni kodanga mamatoksü ", ta pai pelaba lemsatep. "Ni yangi nungi pilar koleni odir oaka, nenoki tang koma kü den temeim benshia arur yamaji teti lidaktsünür", ta paisa mepishia liasü. T. Phojo ya Aor anükabang ka lir.

DC tasen arusang Ajit Kumar Verma-ia mapang tatsüka agidang, pa indang mezüng posting-ji Mokokchung lir, anungji, pa atema iba yimti ya tasen masü aser pa yangi

tanaben arushiba ya tia taka aser jangratema bilemer, ta ashi.

DC ya district nung tokolak ka dang, DC kisüngi kecha mesütetsü, district araka aotsü asoshi külemi lungjemer (team work) shisa obang ka sür inyaksübaji tongtibang lir. Anungji, taoba DC den nenoki koda amalitepa aru, kasaji pa dena lidaktsünür, ta pai mepishia metetdaksü.

Nagaland nung mulungtet telok ya kanga tongtibang lir, talisa iba district nung mulung teloktemji kanga tashi tait, anungji, nüburi aginüba ama inyaktetsüsa nenok nungi amalitep maneni akanger, ta paisa shisem.

2016 batch IAS officer Ajit Kumar Verma, ya Mon nung Deputy Commissioner küm 3 inyaker aruba lir. Pa ya tamalen Mokokchung nung Assistant Commissioner inyak; Wokha nung Sub-Divisional Officer (C); Tuensang nung Sub-Divisional Officer (C) aser Additional Deputy Commissioner inyaker külen Mon DC marudang Niuland DC khen inyaker tang Mokokchungi arur.

Tanü iba sentong nung salem o tatsütsü jembi - Mokokchung District GB Association, Mokokchung district kübok yim ajak tenüng nung Khensa Village Council Chairman, CSOs tenüng nung Ao Senden, Mokokchung district ULBs tenüng nung MMC chairman, DC staff tenüng nung PA to DC Alemtetba, DPDB & HoDs tenüng nung Er. Philip, Admin Officers tenüng nung ADC Mangkolemba Moaküzmük Tzüdir, aser police meyonga Sr. SP-i jembi. Iba sentong nung Mokokchung ADC Hq. Chumlamo Humtsoe menden liasü.

NextGen e-Hospital system indang training agütsü

Dimapur, Monupii/May 07 (TYO): Directorate of Health & Family Welfare, Nagaland ajanga National Informatics Centre (NIC) den lungjemer NextGen e-Hospital system indang training ka May 7, 2025 nü NIELIT, Kohima nung ayongzüka liasü.

District hospital tem nung digital inyakyim tali tashi itshitsü atema iba training ya ayongzüük, kong Medical Superintendents, Nodal Officers, aser DEO/LDA-CAs tem dena liasü.

Sentong nung Dr. Vezukholu Theyo, Additional Director (IT) ajanga pela agizükba o jembidang hospital operations, electronic health records tajungba akumtsü aser national health programs tem den lirumedema inyaksü asoshi next-generation hospital application ya koda tongtipang ta asüba indang rateta ashi.

Item facilities amshirtem nungi telangzüba agütsüba ajanga system takok angutsü asoshi yanglushiba nung tongti shilem agitsü, ta lai ashi.

Anoop Kinchii, Commissioner & Secretary, HFW Nagaland ajanga 'Healthcare System Enhancement through Digital Connectivity' onük nung ajemdaker jembidang digital platforms ajanga healthcare nung apu latsüba,

tashidak puteta anepaluba tajungba akumba aser health awareness tajungba nung agütsütsü indang lemsatepa liasü.

Technical sessions nung Ravindra Kumar, Head of Department, NextGen e-Hospital, NIC ajanga NextGen e-Hospital indang presentation agütsü, kong core modules, system capabilities aser district level deployment atema mapa kuma inyakyonga aotsüba sentongtem awajema liasü.

Iba sülen Master Data Configuration (Parts I and II) indang sessions ana NIC Delhi nungi NextGen Team-i agia shilem agirtem nem mozüki indang digital framework yanglushiba - departments, services, user roles aser data security settings amala indang angazükdakja liasü.

Süngo ajemba sülen NIC Nagaland ajanga hands-on session ayongzüka system navigation, patient data entry aser e-Hospital environment kübok operational tasks amala maparen asangsang nung inyaka saya liasü.

Sentong tembanga sensaksemba aser mangatetjemba asüngdangyaa liasü, koba NIC Delhi aser NIC Nagaland team tem lungjemer ketdang asü.

Mokokchung District Review Meeting menogo



Dimapur, Monupii/May 07 (TYO): Mokokchung District Review Meeting ya May 6, 2025 nü Chief Medical Officer, Mokokchung indang Conference Hall nung mena liasü.

Dr. Sentizungla Marina Yaden, Chief Medical Officer, Mokokchung ajanga iba senden nung jembidang report aser record junga ayutsü aser mapang shidak nung health units temi osang agütsütsü nenshia ashi aser service shidak agütsütsü aser nükjidong tongtettsü asoshi nübu ya tongtipangtiba lir, ta ashi.

Lai health workers tem dang training aser meeting tem nung meranga adentsü aser tangazükba lia pei inyakba tesem nung mapa kuma amshitsü ayongzüka liasü.

Iba senden nung District nung aliba health units tem inyakyim balala, takok anguba aser metokmeperi lepa repringshia liasü.

Iba senden nung Mokokchung district kübok CMO, Dy.CMO, programme officers, SMOs. MOs, Health workers aser DPMU Staff tem dena liasü.

District Hqs ajunga nung 2nd National Lok Adalat alitsü

Kohima, Monupii/May 07 (TYO): Linük ajung aden külemi 2025 atema 2nd Quarterly National Lok Adalat (People's Courts) ya Nagaland State Legal Services Authority (NSLSA) tawabangba kübok district headquarters ajunga nung May 10, 2025 nü ayongzüksü.

District Legal Services Authority (DLSA) temi Lok Adalat Benches 11 amenoktsü.

Legal Services Authorities Act, 1987 read with National Legal Services Authority (Lok Adalats) Regulations, 2009 in the Courts and Tribunals nung mela aliba ama State Legal Services Authority kübok District Legal Services Authorities (DLSAs) ajunga nung küm nung National Lok Adalats pezü ben agitsü mela lir.

National Lok Adalats (People's Court) nungya pre-litigation aser pending cases tem timba benoka jembir aser yangji National Insurance Act cases under Section 138; Money

Recovery cases; Motor Accident Claim cases; Labour dispute cases; Disputes related to Public Utility services such as Electricity & Water Bills cases etc (excluding non-compoundable); Matrimonial disputes (except divorce)/ Family disputes, Land Acquisition cases; Service matters including pension cases; Revenue and other ancillary matter, High Court, district Courts aser state/ district/ taluka authorities nung temdaka aliba ken o, IPR matters/ Consumer matters/ aser ano danga quasi-judicial authority nung pending aliba ken o densema civil aser criminal compoundable cases tem benoka jembir.

Ano danga civil cases (rent, easementary rights, injunction suits, specific performance suits etc) tema jembir.

March 8, 2025 nü 1st Quarter NLA alidang ken o 427 benokba nungi 291 tembangja liasü. Aser yangji sen 3,87,35,

490 indag ken o tem tatem kuma obendang agütsü.

Iba dak sendakba nung osang tejangiaba metetenera District Court kima DLSAs indang Front Offices mesüra Office of the NSLSA, Top Floor, NPA Building, DC office compound, Kohima mesüra toll free NASLA Helpline 15100 or NSLSA Helpline number - 9118003453883 or email nslsa.nagaland@yahoo.in ajanga tongteprateptsü akok.

DLSAs shia indang disposal data ya maneni state authority indang web portal nslsa.nagaland.gov.in nung inoktsütsü.

भारत सरकार कारपोरेट कार्य मंत्रालय त्वरित कॉर्पोरेट समाधान प्रसंस्करण केंद्र (सी-पेस), आई.आई.सी.ए. बिल्डिंग, 7वीं मंजिल, प्लॉट P-6, 7, 8, से.-5, आई.एम.टी. मनेसर, गुडगाँव, हरियाणा - 122050. Email: roc.cpace@mca.gov.in		Government of India Ministry of Corporate Affairs Centre for Processing Accelerated Corporate Exit (C-PACE) IICA Building, 7th Floor, Plot P-6, 7, 8, Sector-5, IMT Manesar, Gurgaon, Haryana - 122050. Email: roc.cpace@mca.gov.in	
FORM No. STK --6 PUBLIC NOTICE [Pursuant to sub-section (2) and sub-section (4) of section 248 of the Companies Act, 2013 and rule 7 of the Companies (Removal of Names of Companies from the Register of Companies) Rules, 2016]			
Public Notice: ROC/C-PACE/STK-2/248(2)/2024-25/314		Date: -29/04/2025	
Reference: Nagaland state nung Companies Act, 2013 indang section 248 kübok (1) companies tenüng aidoktsü mesüra indoktsü atema :			
S No.	Work Item	CIN	Company Name
1	AB3331335	U47990NL2023OPC013902	LKR 90 SOMETHINGS (OPC) PRIVATE LIMITED
2. Company kumteter küm ka tsüngta nung business metenzükba mesüra küm ana tashi business mesüra Companies Act 2013 indang section 455 kübok operation maliba aser dormant company indang status metettsü mechi application (s) magütsü mesüra company (ies) ajanga status of dormant company/subscribers to the memorandum agiaka company tenzüka mapang züngzüktepba ama subscription sen magütsü aser section 10A indang subsection (1) kübok tenzüker anogo 180 tsüngta iba dak sendakba declaration magütsü/ section 12 indang sub-section (9) kübok physical verification aoba sülen business mesüra operations kecha maliba jangiatetba saka parnoki companies ama parnok registration maginüba ajanga Companies Act 2013 indang section 248 (2) kübok register of companies nungi parnok tenüng tem indoktsü/agentsü atema tekalen shia aliba company temi Registrar of Companies dangi application aruogo. 3. Anungji Registrar of Companies ajanga tekalen shia aliba company tem tenüntg ya Register of Companies nungi indoktsü mesüra agentsü. 4. Register of companies nungi company tem tenüng agienba mesüra indokba nung tashishitsü lira, yangi shia aliba office address dangi iba sangdong adoker anogo 30 tsüngta pa mesüra la-i ashishiba yoktsüla. Irkan Tirkey Assistant Registrar			
CBC 07123/11/0159/2526		Centre for Processing Accelerated Corporate Exit	



TIR YIMYIM YIMOBILEM (EDITORIAL)

DIMAPUR

YANGTEPNÜ

MONUPII 08, 2025

Rarateptsü mapang

Alima asünungji, Laishiba nung sayutsüngiri ashi ama, nisunga teti anemabo malir aser teti shiranga malir, aji oda raratsü mapang ka aser puteptsü mapang ka ta süra, tanü ya Russia-Ukraine aser Israel-Hamas nungertem asoshi dang masü saka India aser Pakistan asoshia rarateptsüba mapang ka agi atonger südi. India o Pakistan na ya 1947 tashibo British yimli nung India ta aser yimten ka kübok lia aruba kasa kin aser kasa adianutem dang lir. Ajisüaka, tamangba yimsü ajanga kin balala tsüngdaa longjemdaksütsü melen nisung tamashi ajanga tepila dang piladaksür asünungji, British yimten talenba nungi India saladang, Hindu nung longhua alibalenang India aküm aser Muslim nung longhua alibalenbo linük tasen ka Pakistan ta aser aküm. Aji oda, India nüchiso atema British nungertem den rara saka kodang British nungertemi toktsü India nung rongnung tamangba yimsü agi telok tululu ana kümer taochi mali raratep tenzük. Iba mapang Muslim nungertemi akümba linük Pakistan aser Hindu nungertemi akümba linük India na asoshi timtem tulutibaji Jammu & Kashmir lima ya koba ama yimten jenjang ka nung yutsütsü ta asüba tebilemstüji liasü, kechiyong iba mapang ya Jammu & Kashmir-bo Hindu nung chuba Hari Singh kübok liasü, anungji iba Maharaja, chuba nemji India den adentsü asü mesüra Pakistan den adentsüar, pai mulungba ka shimtsü asoshi maongka agüja liasü. Atangji, Kashmir chubai tamasabo yimten nüchiso jenjang meshi saka Pakistan nungertemi par lima den tendaksütsü kanga amokmerenba agi, aji marem tesüsabo Kashmir chubai India den adentsüang mulungtet, kechiyong chubaji Hindu nung liasü. Iba jagi British yimten kübok talenba nungi salar mezüng India o Pakistan na rara 1947 nungi 1948 tashi liasü. Iba rara ya 1949 küm kin ana tsüngda United Nations nungi dena kuli sütsür arua Karachi Agreement yangluba ajanga anen aser kin ana tsüngda Cease-Fire Line (CFL) lateta toktsü. Iba nü nung jagi Kashmir ya ana kümer külen Pakistan aser külen India ta lemdanger yimsü asür. Atangji, Karachi Agreement jagi kin ana tsüngda Kashmir raktepba rarabo anendaksü saka teti yimjung nung alitsüsabo yimten telatetbabo magütsütet. Iba jagi 1965 küm-a India aser Pakistan na khien sashia raratep aser iba sülen 1971 East Pakistan mechi India o Pakistan na ano khien kanga sashia raratep aser iba rara tongpang nung India teyari agia Pakistan kübok liasüba nungi East Pakistan yimten nüchiso angu aser parnoki iba lima dangji Bangladesh ta aja. Iba rara yaa 1972 küm Simla Agreement ajanga anen aser iba yimten tangatettep ken o ajanga Kashmir ana küma ladanger, külen Pakistan aser külen India kübok ayutsü arr ladangba dang Line of Control (LOC) ta aja. Ajisüaka, iba sülena mapang mapang shia Kashmir mechi kin ana tsüngda meputep adoka rarar. Atangji, tang tashi nungbo rara shia India-i dang koka aru saka iba jagia Kashmir yimten tebilemsü yabo tatembang mekümtet. Aji oda, British nung aliba mapang tashika Kashmir ya Hindu nung chubai yimsüsüa liaka, nütsüngbo Muslim nung teimba asünungji, Kashmir yimten nüchiso atema rarar Muslim nung telongpurtem aika lir. Item jagi mapang mapang shia lendong tululu agütsür. Aji oda, taoba ita April 22 nü Kashmir nung raliwalirtem monga alidak kirolangrartermi India nung Hindu nung 25 den Nepal nung ka ta taochi makai tepseta yutsüba mapa yaa item telong nung alir kiralongrartermi mapa lir. Atangji, Hamas-i ajungbena Israel nung kenten benjong ka lia alidang amakba anema Israel nungertemi Gaza nung Hamas telok purtem anema sashisashia makyonga aoba ama, Indiai inyaknüsüka, kechiyong aji alima kin ka mezüngmeshiba mapa lir. Atangji, 2019 küm center government-i Jammu Kashmir yabo temzünga balaka asüba agientsü aser state ka agi Union Territory ana kümtsü. Iba jagi balaka Kashmir yimten nüchiso atema rarar Muslim nung telongpurtemji jashia alitsüa akok. Ajisüaka, tawa April 22 nü inyakra mapajibo taremla masü, anungji Pakistan kübok aliba Kashmir nungertem danga India-i lesson kabo sayunütsü. Ibayongji, India-i Pakistan tsütsü alir kiralongrartermi alidak tesem "Operation Sindoor" ajanga amak tenzükogo aser Kashmir nunga kiralongraba mapa nung temulung melembi bilemertem kiojen aika raksatsüogo. Atangji, tang ama mapang ya India-i kanga kümdanga inyakra, mechi mesükdang ser per züksettetsü.

OLEMSABANG

Asenoki meyokteba jembiba Ojang karh

T. Meren Paul, Kohima

Asen Ao oshi ya sensaker ta aikadi ashir saka kanga sensakrabo masü oda tanü asen tendak asenoki Ao ya Modiba-i Political Science ajak azünga amaji (entire Political Science)ajakshiamangazükba agi Ao oshi ya sensaker kumdaksür. Akhi otsülaouboula nung-i jembiba tetezü tarok aketba oshioben ojang aser olong, shiruru, ozüsangnu, süngdonglidong süngjanglijang aser takumsangnu tenüngdemaika asenoki parnokdang nungi angazüka yua mejembiba agi asen oshi tajung aika teti asoshisamahdaksüogo aser maneni samahyonga odarh. Ao oshi ken O kaket zülu tejakleni anitsü asoshi linguistic yim nung dictionary tajung adoktsüji kanga tongtipang aser nüngdak, saka tamendakbajibo tejembiba oshi ojang aser olong tamasa meteta alitsüla. Yimdak yimtsüngdem nung Ao kopangtsüng atsünger roko asenoki joko aikamangur, tetezü, oshi ashir tamburdemto iba lima nungi peladokogo aser parnoki shiameteta aliba oshi tajung to parnok den samahdaksügo. Aji oda asen Ao oshiji sensaker ta ashibaji samadaksüba agi, matong alinung lepdoka endok amah, tali sensaker kumdaksur. Aiben tetezü meyokteba meshidaki jembiba ojang karh lanurdem angazütsü zülutsür.

1. Amaletap - Yimten, telok ana tsüngda nung jungtepa, puteba yaritepa aliba
Atongsem-Nisung ana tsüngda nung jungtepa yaritepa aliba
2. Metsükmena-Tetsüng tepen merakmejuba, shidokshiraba
Mesükmena - Jangkojangnem, tesüsüh, korokoji
3. Shirangshiji-Tashidak palala agi shirangdaksüba
Manemshilu- Ketsa shirangba tashidak tanaben meyipa arua adongba, relapse
Warashira/Yimra - Tashidak ka yimer aika dak ken mapang ketsa nung adongba; epidemic, viral
4. Lemtamatar-Tsüngtsük longtsüker, tenüktelen raksaer sadema mapa inyaksü makokerdem, akidang Physically Handicapped ta aja, disabled ta melen, tanü asüngbo differently able person ta ajar
Matamabensar- Tasodang yongimabensa tenük tapok, temeli tatsük, tenarongajak, shisatsü agi mabensa asoba rogo
5. Anüngalu - Peria agir magimah anünga yutsüba
Tanüngtalu - Tajung masü, tagitaro majung anungji mamshii doktsüba
6. Teshimzük- Tulu tajung shimteter tila teri shimzüka doktsüba
Teshimdok- Kanga tajung masüba, tagitsü majung doktsüba
Tanüngzük - Tagitsütajung saka peria agir magimah anünga yutsüba
7. Jilajidong-Talang nungi osang benteba agutsüba, phone agi, shity agi osang tongtepa
Tongtepratep- Tsüngdong wagi ajuruteba jembishinüba
8. Wawamenü- Longsolongbentsü lokdi dang temenünütsü otsü jembia pelatepdaksüba
Menüshishi-Medemer rongnung, nisung eshika asaya menü agi pelatepa
9. Temdangsüngdang- Kidang osettsüset junga tiptema rezünga mayuba, untidy
Kadangmatang- kima yimdang aser lenmang nung süng lung merepshia ayuba
10. Alushi- Tetsür kiyie aodang alu ayimtsü tsürapuri alu ka agutsüba koba la arishi tembangerbo tanapen meyiba agitsü
Alula- Tetsür kiyie aodangtsürapuri teti asoshi alu ka teret den lazüka agutsüba
11. Ajok - Süngji, Süngkum mesüra Ar agi nateta mechi amah yanglur nisung aser shiruru azüoktsü nung amshir aser mechi amah amshir, rod
Mecha - lenmang nung jajadang teyari angutsü asoshi süngkum, ar mesura süngji agi nateta yangluba, staff
12. Arasentsür - Küyi mesüra jungno tanüla aketer nisung tebur shiri nisung dak nungi tashidak ara sendoktsür aser tia shiteter, soothsayer, lycanthrope
Ongangla -Tetsür Arasenerdang Ongangla ta ajar, female soothsayer, lycanthrope
Tsürapur ken nung atenba; Oh Chungliyimti kongnung, Mangdang ayimer-er, Ar salang bang nung, Nütsüng tümang senden a-ali, Tsüngrem kumer Ongangla dang jagi, Amdong amsü wani, Tzüsentsübo külema ang-da, Tzügen tzübo külemteta yu-li, Orang sako agi, Yimrong süngsong tuden ko o-ni.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Baptize California sentong nung kenüyongi nisung 7,750 bapti



May 03, 2025 nü Huntington Beach, California nung 'Baptize California' sentong nung tangokba noksa nung angur. Iba sentong nung nisung 7,752 baptiogo, aser ibaji America nung puti otsü nung anogo ki kija nung nisung teimtiba baptiba lir.

May 07, 2025: Honibarnü (May 3) Huntington Beach, California nung anogo ka kija nung nisung 7,752 baptiogo, aser ibaji America nung puti otsü nung anogo ka kija nung nisung teimtiba baptiba lir, ta osang ka ajanga metetdaksü.

Ano June ita nunga iba dang nungjagi sentong tuluba ka renema lir.

Tang agi tanabenbuba "Baptize California" sentong agiogo.

Yaküm mezüng May ita nung ayongzüka agiba Baptize California sentong nung nisung 6,000 dak tali baptia liasü. Yaküm iba sentongjia Huntington Beach nungsa agia liasü.

May 3, 2025 nü anogo piyong agiba sentongji nikongdang tashi nung tembanga liasü. Pacific Ocean tzüymküm nung tanur-tain, tetsür-tebur aika tarensena nokdaker yimjak nung Yisu Khristaji pei Kümtetdakba, ta sangdonga baptia liasü.

Bethel Music den Cody Carnes aser Kari Jobe nung densema osangtajung

kentenertemi shilem agia liasü. Iba sentong nungji nisung 30,000 shi aden.

Oceans Church nung pastor, Mark Francey-i lokti dang, "America nung puti otsü nung nisung teimtiba baptiba sentong nung na-a shilem agia adener. Shibai metet, Tsüngremi tanga state tem nunga kasaji inyaktetsüa akok," ta ashi.

Honibarnü mezüng baptilaji arrshi küm 71, Joanne liasü.

Sentong ayongzükertem den jembidang lai, "Ni baptitsü atema tesüiba küm 40 tashi atemshia liasü, saka küm aika thinen aruogo," ta ashi.

La baptitsütsü mapang nung pastor Francey-i, "Tang onoki Tebu, Techir aser Tanela Temeshi tenüng nung na baptitsür," ta ashi.

Taküm June 8 nü Baptize America sentong ayongzüka lir, aser iba sentong ayongzüker pastor tem rongnung pastor Francey-a densema lir.

Baptize America sentong nungji US tesem balala nung aliba Arogotemi shilem agitsü imlar aser kenüyongi nisung

teimtiba baptiba sentong asütsü imlar.

Taküm June 8 anogo ya Pentecost Sunday lir.

Francey-i, "Asen state ajak nung aliba local Arogotem nung Tenla ki sünga adenshitsü, aser asen lima nung khenyongi nisung jenti baptiba asenoki angutsü," ta ashi.

Baptize America sentong ayongzükertemi local Arogotem ajak ayongdentsü aser tzü nung baptiba ajanga yimjak nung pei tamang sangdongtsü.

Baptize America indang website nung yamai shia lir, "Iba ya Arogo ka kija indang masü. Iba ya linük tesem ajaklen Arogotem longjemer Kibubai tenyaba wadang tulu ataloktsütsü atema nükjidong yur inyakba mapa ka asütsü."

"June 8 anogo nung asen linük aser alima nung kintemi, Tsüngremi America mesendok, ta kulisüa angutsü. Tsüngremi California nung mapa inyaktetra pai state ajak nung inyaktetsü. Pai alima nung aliba kintem madak inyaktetsü," ta website nung shia lir.

Presbyterian Church in America (PCA) züngsem kanga renlokogo



May 07, 2025: US nung Arogo aika nung züngsemtem ajema akümba mapang nung 2024 küm Presbyterian Church in America (PCA) nungbo nisung aika baptia züngsem kanga renlokogo, ta osang ka ajanga metetdaksü.

PCA kübok aliba Arogo 1,667 nungi Arogo 992-i agütsüba statistic nung ajemdaker renemba report ajanga Arogo nung nütsüng shilem 1.84 renlokba jangja. 2003 küm züngsem 3,93,528 aliba nungi 2024 küm nungbo

züngsem 400,751 aküm.

Tesüiba küm asem tashi küm shia PCA nung züngsem tali renloka arudar.

Ano 2020 küm nungi 2024 küm tashi nung baptiba, Tenla agütsüba aser timtemertem yariba teimba liasü, ta kasa osang ajanga metetdaksü.

2020 küm nungi 2024 küm tashi nung taintem baptiba shilem 16.56 agi teimba aküm (tain 3,083 bapti). Kasa mapang nungji tanurtem baptiba shilem 14.08 agi teimba aküm, aser kinü tanurtem baptiba shilem 2.4

agi teimba aküm.

2024 küm PCA Arogotem nung tenla arubaji dollar sen billion 1.29 liasü aser ibaji 2023 küm den medemdangra shilem 15.98 agi teimba liasü.

2023 küm PCA Arogo 1,645 liasü saka 2025 küm Arogo 1,667 aküm.

Tawa report ka ajanga ashiba agi, US nung Evangelical denomination tulutiba- Southern Baptist Convention nung 2024 küm züngsem million 12.72 liasü aser ibaji 2023 küm den medemdangra shilem 2 agi tajema akümba lir.

Ano külen Arogo meyirjang aikati United Methodist Church (UMC) toktsüogo, aser ibaji talisa kasa atsüapong medemba onük nung tangatetba balala aliba ajanga lir.

2019 küm nungi tenzüka Arogo 7,000 dak temai UMC toktsüogo.

ANO GO ABEN TSÜNGREM DEN

Taidok angutsü taidok agüjang

Aser ozüi kechi koda pi dang tai doka lir, aji oda ozü taia tokangma.

Mathi 6:12

Mapa kar taidok agütsüba dang nungi agizüktsüba tali senti lir. Asen menen khuret bener külen aseni tai inyakba ajak nungi nüji kümdaktsübaji tesüngmangtsü ka lir. Yisui nütsüngtem dang parnoki sarasademba shia tai tokang ta sarasademang ta sayu. Asenoki anogo shia Tsüngrem anema inyaker ta Yisui metet. Asenoki Tsüngremi aginüba jenjang matonger. Anogo kata Tsüngrem dang tatok memeshi-i süidaktsütsü makok.

Asenoki asen anema inyaker dang tatok agütsüra, Tsüngremia asenok nem tatok agütsütsü kechiaser asenoki koda tangar dang tai atoker Tsüngremi yamaji asenok dang atoktsü ta Yisui tekümdangtsü agütsü (Matt. 6:15). Tsüngrem yimyai tatok agutsutsuba lir (Anitet 34:6-7). Asenoki Pa nütsüngtem sünera, asenoki Pa tatishitsü nung anidaktsüla. Teti asen tsükchir dang Tsüngremi tatok agütsüra, asenoki tilaba kecha inyaktsü makok. Mapa kar nungbo tatok magütsütsüla ta Yisui mashi. Tatok magütsütsü Laishiba nung shia mali.

Nai kar nembo tatok magütsütsü mulungtetra ne tekülem aser sarasadem amajok (Matt. 5:23-24). Ne mulungjangi item tammangtem bushitettsü Tsüngrem dang asüngdangang. Nai taidok nüngdak bushidang tangar aibelenji mesüka alitsü Tsüngrem dang asüngdangang, idangji nai rishikangshir asoshi "Oba, parnok dang tai tokang" ta sarasademtsü.



Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA

E-mail : abamimpur7@yahoo.co.in

Website: www.abamimpur.org

Dated Impur the May 6, 2025

To

Ao Arogotem / Fellowship, C/o. Pastor

Subject : Ao Arogotem Lokti Sarasadem Ayonger

Khrista nung temeim tenzükertem,

Khrista Temeim salem amangbapur ajak dangi ABAM office ajanga abener.

ABAM-i teti nenok asoshi Tsüngrem tenüng sanga alir, kechiaser nenok tangatetba aser mapa tajung ajanga teti Kibubar sentong jungkai adoktsür.

Tamangertemi kija aser lokti balala nung mapang aben alima tensa majungba atema sarasadema arudagi. Kechiaser tanü alima tesem balala nung rara ajanga meimchir jendi asüba den alima jenjang laoba ajanga yimjung aser tesünep samaa odagi aser meimchir alitsü tasak kümogo.

Yamaji tanü asen lima India aser Pakistan tsüngda tensa tamajungba akümba angur. Iba amala tendak asen tamang sarasadem kanga nüngdaker. Sarasadem ajanga ajak melenshidaktsür, kechiyong asen Tsüngremi makokba kecha mali.

Anungji taonung (7 May 2025) Tekülem nung mapang balaka agiteta kukua Tebu Tsüngrem dang yimjung asoshi sarasademtsü ayongzüker.

Iba mapang :

a) Tsüngrem den mapang tajung agidi,

b) Aseni aibelenba tatok meshidi.

c) Mojing sentong madak takok meshidi

d) Rara melen tangatetep aser yimjung arutsü takangba ola yokdi.

Tensa agi bener arutsü nung ajongbena süaka iba lokti sarasadem ayongzüker. Tesüiba mapangtem nung ama taonunga Arogotem ajak nung sarasadem mapang tajung agitsü imlar. Yamaji Tsüngremi asen sarasadem langzütsü tamang akar.

Nenok den külemi Tsüngrem tenzüker,

Sd/-

Rev. Ayutemjen

Tir, ABAM

Sd/-

Rev. L. Yapang Mollier

Officiating Executive Secretary

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Temlaola

(v) kolakushia ken atenba, amen ken atenba kensü (slurs in singing)

* Terok tajungiang temlaola ken tenteter.

Temo

(n) shi tesola (fat)

* Ak shi temo kangabo machitsüla.

OLONG PAITEP # 7145

1		2				3		4		5
6					7					
				8						
9						10				
										11
	12					13		14		
15										
		16				17		18		
19					20					

TIPIEN

- Chiyongtsü makai timatempa - (7)
- Tenüing atet - (3)
- Tez _ _ _ _ ng - (4)
- Nemjema bilem - (4)
- Tzü amshia ayimba lu - (5)
- Sü apuba lisü - (4)
- Tapok - (4)
- Masüa ta ashi - (5)
- Ozü tobur tajung ka - (4)
- Yimten tsüngda - (4)
- akangjungshitepba yimya - (4)
- Ayong ajangdanga yangluba - (3)
- Lumang / Alikong - (7)

LANGTSÜNGLEN

- Teka agi ambang - (6)
- Ozüngi temeten magütsü - (5)
- Tzü atsünga aliba tesem - (8)
- T _ _ _ k - (3)
- Teimba aküm - (4)
- Achi ajemtsü mungui kangshi - (8)
- Kecha mait - (6)
- Reprangtsü atema ayuba - (5)
- Aika masü - (4)
- Ozü ka - (3)

OLONG PAITEP # 7144 TELANGZÜBA

TIPIEN :

- Tanga, 6. Wara, 7. Rajang,
- Anük, 10. Jenjang, 11. Alar,
- Ngashi, 15. Nala, 16. Mechi.

LANGTSÜNGLEN :

- Anga, 3. Yabang, 4. Tarok,
- Orak, 8. Ainer, 9. Anema,
- Jabili, 11. Among, 12. Miim,
- Anem.

NAI-A YA METETTER MA



Maldives President Mohamed Muizzu-i May 3, 2025 nü marathon press conference ka agiogo aser iba ajanga otsü tasen ka yangluogo. Muizzu-i ghonda 15 jungnua khen danga maneni marathon session agia liasü aser idangji pai journalists-i asüngdangbatem langzü.

Arishi küm 46 tain Muizzu-i Honibarnep 10:00 ako (0500 GMT) nungi marathon press conference tenzük aser ghonda 14 ser minute 54 agia liasü. Iba mapang piyong pai sarasademtsü atema mapang tatsütsü agia liasü ta Maldives President's Office-i metetdaksü.

Iba ajanga 2019 küm Ukraine President Volodymyr Zelenskyy-i ghonda 14 press conference talangtiba agia aliba ajatet.

Assam Panchayat Elections nung vote enoktsür 56.71% liasü



Guwahati, May 7, 2025

(Agencies): Bodbarnü Assam Panchayat Elections tanabuba shilem tiptema agiogo.

Central aser lower Assam nung district 13 nung 91.31 lakh registered voters nungi parnok 56.71% shi kati polling nung shilem agiogo ta osang angazüker.

Tanep 7.30 ako nungi nikongdang 4.30 ako tashi designated polling stations

12,130 nung polling agia liasü aser ketdangsürtemi final turnout figures metetdaksütsü.

Tanü nikongdang 3.30 ako tashi nung vote enoktsür 56.71% shi liasü ta State Election Commission-i ashi.

Tanü Dhubri, South Salmara-Mankachar, Goalpara, Bongaigaon, Barpeta, Bajali, Nalbari, Kamrup, Kamrup (Metro), Hojai, Nagaon,

Morigaon, aser Darrang district tem nung Assam Panchayat Elections tanabuba shilem agi.

District tem rongnung Bongaigaon nung voters teimtiba 62.72% aser Kamrup nung tajemtiba 51.33% liasü.

Tanü Chief Minister Himanta Biswa Sarma-ia Amingaon Bengali Higher Secondary School nung vote enoktsü. Iba ya Kamrup district kübok CM Sarma'er Jalukbari constituency kübok lir.

Assam Panchayat Elections tanabuba shilem nung polling stations kar nung danga tim masüba mesüra mepetemsü kar lira May 9 nü repolling asütsü ta ketdangsürtemi ashi.

Assam Panchayat Elections indang results ya May 11 nü sangdongtsü.

Assam nung Pahalgam atema Pakistan pusmer 2 apu

Guwahati, May 7, 2025

(Agencies): Pahalgam nung kiralongrartemi amakba sülen Assam nung Pakistan nem

tenüngsang agütsür nisung ana ano puogo ta Chief Minister Himanta Biswa Sarma-i ashi.

Tena ya Sonitpur nungi Sajid Ahmed aser Goalpara nungi Rojan Ali na lir ta jangjaogo. Tena züngsema tang tashi nung nisung 45 pua lir.

"Tang tashi nung Anti-Nationals 45 tashi tepuokdak yua lir. Onoki ano talila aputsü bushidar" ta CM Sarma-i ashi.

April 22 nü Pahalgam nung

kiralongrartemi nisung 26 tepsetba sülen linük ajungalen Pakistan pusema jembirtem apur.

Assam nung pua alir karbo National Security Act (NSA) kübok ken o benoktsü. Parnok karibo tatok meshiogo aser tarutsü nung ibala meinyaktsü nangzükogo ta Sarma-isa ashi.

Tang pua alirtem ya habitual offenders, those seeking publicity, aser those with political motives ta telemsa asem lemsatsü ta paisa ashi.

NSA benoktsü atema luden

kati telemtetba agitsü. Pakistan-i kiralongraba mapa nung shilem agi ta asüba nung AIUDF MLA Aminul Islam-i Pakistan pusema nungitba sülen Assam nung Pakistan pusmertem aputsü tenzük.

Pahalgam amakba sülen "Pakistan Zindabad" yimyim ayimertem merenshitsü ta CM Sarma-i metetdakja liasü.

Prime Minister Narendra Modi aser Indian Army nungeri ibala kiralongra mapa inyakertem merenshiba nung public-i pusema nungittsüla ta CM Sarma-isa ayongzük.

Governor Nallu & CM Saha nati 'Operation Sindoor' tenüng asanger

Agartala, May 7, 2025

(Agencies): Tripura Governor Indrasena Reddy Nallu aser Chief Minister Manik Saha nati Bodbarnü "Operation Sindoor" pusema nungitba metetdaksüogo.

Bodbarne Indian armed forces-i Pakistan kübok kiralongrartem tesem ishika amak aser iba ya "Operation Sindoor" nung shilem ka lir.

"India dak tamajung inyakertem metoktsütsü ta

Prime Minister-i jangajangja shiogo. Kiralongrartem training camps amakba ajanga pai iba tenangzükba inyakogo. Pakistan-i meyiper rarara India renema lir" ta Governor Reddy-i ashi.

"India senso shia renema alitsüla. Linük ajungalen mock drills nung ajaki shilem agitsüla" ta paisa ashi.

April 22 nü Pahalgam nung kiralongrartemi amakdang tai

maketba tourist 26 khaset. Iba atema telangzüba agütsüba mapang tongogo aser kanga tapet langzüogo ta Chief Minister Manik Saha-ia ashi.

'Operation Sindoor' ya kanga dang junga inyakogo aser civilian dak mekongshii kiralongrar infrastructure samatsüogo. Iba ajanga sorkari national security atema tenangzükba kuli agütsür ta Saha-isa ashi.



Manipur Police-i inter-state vehicle auyaba maparen ka putetba sülen Imphal International Airport anasa auyaba gari ka den driver ka apuba noksa nung angur. Traffic Control Wing-i Tiddim Road nung special drive ka agidang Alto 800 LXI gari ka sot ta Manipur Police Control Room-i ashi. Iba gari ya e-challan device ka ajanga mita reprangdang Public Vehicles Department (PVD), Kolkata ajanga "Not to Be Transacted" (NTBT) agüja aliba metet. Lalbazar, Kolkata nung Anti Motor Theft Squad ajanga osang agütsüba nung ajemdaker NTBT status ya agütsüba liasü. Iba jagi Manipur Police-i driver aser gari apu.

GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA

NO.DTE/SCTE/6/2023-24/

Dated, Kohima, the th May, 2025

NOTIFICATION

NO.DTE/SCTE/6/2023-24: In continuation to this office Notification of even No. dated 1st May 2025, the 2nd Selection to undergo 3 (three) years Diploma Programmes in Engineering, Fashion Technology & other professional Courses within the State run Government Polytechnics for the academic session 2025-26 are hereby declared based on HSLC merit and the preferences exercised by the candidates. Details are available in all Polytechnics and can also be accessed in the Department website <https://dte.nagaland.gov.in>

IMPORTANT

1) Second Phase issue of Nomination letter : 8th - 12th May 2025

2) Last Date of Admission for Second Phase : 14th May 2025

3) After the last date of admission for second phase i.e 14th May 2025, the remaining vacant seats shall be notified and admission shall be given to interested candidates on first come first serve basis based on vacancy.

4) Failure to collect the Nomination letter within the above stipulated time shall result in the cancellation of the Nomination and no further request/complaints will be entertained.

(ER. VIPULHOU LHOUNGU)
Director

Israel-i Gaza tesem balala amakdang nisung 31 tepset

Gaza City, Monupii/May 07 (Agencies): Israel-i Gaza nung tesem balala amakdang nisung 31 tepsetogo aser ita ana dak tema iba tesem mokdanga bomb pokloktsüba ajanga chiyongtsü agi kanga anünger aser Palestine nunger tali yasa-tzüradaktsür.

Israel nungeri Bodhbarnü amakba ya Gaza tesem balala nung liasü aser Gaza City kübok Tuffah kiyong nung aliba al-Karama School nung tenük yoker amakba nung nisung 13 asü.

Ano north tsütsü Jabalia nung ki ka amakba nung nisung asem tepset aser aika yirua liasü.

Gaza south len Khan Younis yimti nunga ki ka nung amakdang tebu ka, par tanur aser kinunger densema nisung tit akum sama.

Central Gaza Strip nunga Deir el-Balah nung süki ka kongshia amakdang tanur ka densema nisung asem tepset. Strip anüdoklen Bani Suheila yimtsüng nung amakdang ki ka nung kongshi aser yangji kinungtsü aser kinungbu asü.

Gaza Strip tiyonglen aliba Bureij refugee camp nung tesem balala nungi pei ki yutsür arua jenoka aliba school ki ka

nung Israel-i amakdang nisung 31 tepset aser aika yiru, ta Gaza indang civil defence agency ajanga Mongulbar aonung shir lia iba lendong ya ataloker.

Tali tesashiba amakba den ano March 2 nungi tenzüka Israel-i tongtipang supplies ajunga mokdanga aliba ajanga iba linük nung totzü, chiyongtsü aser mozü agi kanga anünga kumogo. Chiyongtsü tem tagimar, ta aid groups temi ashir.

Gaza nung United Nations agency for Palestinian refugees (UNRWA) facility ka nung jenoka aliba tanur trok tetsü kati am dak alaka chiyongtsü ajak agimaogo ta ashi.

"Israel-i mokdanga aliba agientsüla. Iba humanitarian catastrophe ya kodanga mongudangba jenjang tasen kati ayaoka maidang linük balalai mera tajung agitsüla," ta UNRWA ajanga Bodhbarnü X nung zülua liasü.

Tang tanen makai amakba aser mokdangba ajanga Gaza indang health sector nunga timjem jenti ajurua lir, aser mozüki tem nung yipten shilem 88 shi süngogo aser mozü agi anünger.

Bodhbarnep Egypt aser

Qatar linüki kodanga majangshidangba humanitarian crisis tatem kati arudaktsütsü aser civilian tem timtemba nungi aniteta ceasefire alitsü nükjidong nung maneni inyaktsü ta sangdonga liasü.

Mezüng ceasefire alidang linük ana den United States densemer tetsüngtai ia yimjung ken o jembia liasü.

"Adianu linüktem tsüngta tamang makatepba, shidak masüba mesüra media escalation ajanga temulung melemtepba nungi adokba ajanga linük anati lungjemer rara tembangtsü asoshi inyakba nung tetsükdaktsü magütsütsü," ta sangdong ka nung ashi aser tezüngzüktep ka yanglutsü atema US den külemi inyaker ta metetdaktsü.

Ceasefire deal ya mezülutep tashi Gaza nung mitkar temi tesashiba amaktsü ta Israel-i sangdonga lir, saka Hamas-i jembishinütsü nüngdak madoker ta ashir.

"Gaza Strip nung yasa-tzüradaktsüba rara aser extermination rara ali tashi ceasefire tasen ka atema jembitsü nüngdak madoker," ta Hamas ketdangsür Basem Nam-i Mongulbarnü osangbener dang shia liasü.

Ceasefire atema nangzüktepba nung Israel mamaktsüba mali: Houthis

Sanaa, Monupii/May 7 (Agencies): Yemen nung amendaker aliba Houthi telok aser United States na ceasefire atema nangzüktepba nung Israel anema jenjang magitsüba indang kecha shisema mali, ta iba telok indang ken o sensaksemer tongtibai ashi.

Mohammed Abdulsalam-i Bodhbarnü Reuters news agency dang ashiba agi, Oman teyongtsüi ia nangzüktepba nung Israel mamaktsüba indang kecha shisema mali.

Israel nunger warplane temi Yemen kübok Sanaa airport amakba sülen ghonda ishika lir iba osang ya sangdonga liasü.

Airport director Khaled al-Shaief-i Al Masirah dang Bodhbarnü ashiba agi, Israel-i iba airport amakba sülen USD million 500 shi akoksaogo.

Iba tenangzüktepba yangluba ya US tir Donald Trump-i anogo ka jelia sangdongogo. Pai ashiba agi, Yemen nung Houthi pur tangsa tang amakba anentsü, kechiyong parnoki Red Sea nung rongtem amakba anentsü nangzükogo.

Mongolbarnü sangdong ka ajanga Omani Foreign Minister Badr Albusaidi-i ashiba agi, tawa sensaksema sülen telok ana tsüngda ceasefire benoktsü mulungtepogo.

"Telok anapronglai kati ka memakteptsü aser Red Sea nung

rongtem kecha tetsükdaktsü makai senzusenpongtsü melatsü," ta pai ashi.

2023 küm October ita nungi Israel-i Gaza amak tenzükbä sülen Houthi teloki Palestine nungertem pusema Red Sea nung Israel den sendaka aliba rongtem amakba den Israel kübok tesem balala maka arudar.


Taküm küm tetenzüklen Gaza nung ceasefire benoker aliba mapang Houthi telokia parnok inyakyim anena ata, saka Israel-i Gaza nem tanaben tenokdangba agütsüba sülen Houthi puria Israel anema taoba mapang ama inyaksangshi tenzükogo.

(Maneni tapak 8 nung...)

TENÜNGSANG AGÜTSÜR



Sd/-
Lipokzulu Tatar
Mekumpong Menden Ungma




Sd/-
Imtisungkum Tatar
Mekumpong Menden Ungma

Tawa NPSC Exams (CESE) 2024 sangdongba nung Arenlong Longkumer kinungtsü aser Asür Imnachuba Jamir jala, **T i a w a p a n g l a - i** Department of Higher Education kübok Assistant Professor (English), B.Ed. College mapa ngutetba atema Mekumpong Kosasanger Pusu Menden ajanga tenüngsang agütsür. Maneni tarutsü wadang nunga la asoshi takok lidakjang ta moatsür.

SANGDONGER

2024 küm tashi Mangkolemba Baptist Arogo ta amshia aru, saka 6th Luchii 2024 Arogo inti mungdang nung 2025 küm Aenjeti nungi official ajak nung Mangkolemba Town Baptist Arogo ta melenshia amshitsü lemtetba ajak dang sangdonger.



Rev. Dr. Lepden N. Imchen
Pastor
Mangkolemba Town Baptist Arogo



Mr. Yanger
Clerk
Mangkolemba Town Baptist Arogo



IN THE COURT OF
PRINCIPAL JUDGE
FAMILY COURT
DIMAPUR :: NAGALAND

SUMMON FOR SETTLEMENT OF ISSUE
(ORDER-V, RULE - 1, 5, 20)

CASE NO.....Divorce.12/2025.....
PETITIONERShri. Lanumongba Jamir
RESPONDENT ..Smti. Nukensangla.....

To,
Smti. Nukensangla
D/o. N. Tali Aier ; R/o. Yajang 'C' Village, Mokokchung, Nagaland

Whereas the above named petitioner has instituted a case against you for U/S. 10 of the Divorce Act 1869 R/W Sec 27 of the Spl Marriage Act 1954.
You are hereby summoned to appear before the Court in person or by pleader duly instructed and able to answer all materials questions relating to the case on 6/6/25 at 10:30 AM without fail.
Take notice that in default of your appearance on the date mentioned the case will be heard and determined in your absence.
Given under my hand and the seal of this Court, this 30th Day of April 2025.

PRINCIPAL JUDGE

ARITEPA

AYOKER

Nihokhu nung Highway anasa ali tzüng @70/sqft. agi ayoker. Tasazük mashi angutsü. Kanga aritepa ayoker
Contact : 97742 20551 ; 89748 69756 ; 84150 81855

RSF-i drone amshia Port Sudan amak

Dubai, Monupii/May 7 ajanga nüburtem aika pei talidak

(Agencies): Sudan army-i ki toktsür jenshia aoba den ashiba agi, parnok indang anti-aircraft system temi Bodhbarnü Port Sudan nung naval base ka amaktsü atema yokba drone tem khadanga liasü.

Yimti nung bomb apokba ola angashiogo, ajisiüaka item bomb tem ya Flamingo base anasa apoka asü masü mejangja.

Sudan indang paramilitary Rapid Support Forces (RSF)-i drone amshia amakba densema Port Sudan ya anogo aika ali aser anüng ajanga maka arudar. Iba tesem amakba mapang linük indang fuel depots tulutiba nung mi adokdaktsü aser humanitarian teyari asoshi kikümtong tongtubangtiba raksaja liasü.

2023 küm Army aser RSF na rara adoker mepetmesü tulu adokaka iba Red Sea tzüküm nung amendaka aliba yimti ya mapang talangbaka kanga süngjema aruogo. Iba rara

ajanga nüburtem aika pei talidak ki toktsür jenshia aoba den ayawara tenzükdaktsüogo aser kin o kin tsüngda rartep tenzükdakja liasü.

Mangatettep tetenzüklen RSF puri linük yimtiba Khartoum tuluba ka atsüngba sülen army den sendaka aliba sorkar atema Port Sudan ya tamendakdak aküm.

Army-i tawa linük yimtiba aser central Sudan nung tesem aika agiyonga aoba mapang tang Port Sudan maka iba tesem ya raraba tesem tasen ka kümogo.

Telok ana tsüngda takok tamakok melentepa nguyonga aruba mapang drone temi tongtibang shilem agidar aser telok kati danga rara akoktsü mimlar.

Army aser RSF na tashi toktepba sülen iba rara ya tenzük aser telok anaprongla nem bendangertemi teyari agüja arudar.

Suryakumar-i Sachin indang IPL record ka ajatet



Monupii/May 7, 2025

(Agencies): Suryakumar Yadav-i Mumbai Indians (MI) puti otsü nung otsü tasen ka yanglua club nungi Indian Premier League (IPL) seasons asem nung run 500 mesüra iba dak tema yangluba mezüngbuba asayar kümogo, aser pai Sachin Tendulkar aser Quinton de Kock na ajatetogo. Sachin aser Kock nati season ana nung run 500 mesüra iba dak tema yanglur liasü.

Bodhbarnü Wankhede Stadium nung MI pur Gujarat Titans (GT) den asayaba

mapang Suryakumar-i ball 24 nung run 35 yanglua iba alizüng tongtetogo.

Suryakumar-i tang asaya aliba season nung 12ben atonga run 25 dak tema yangluogo, koba batter kati danga ajangzükteta mali.

Pai asaya 12 nung run 510 yanglua 2025 küm IPL nung pa tang atemabo run timtiba yangluba asayar lir. Pa indang average ji 63.75 aser strike rate 170 dak tema lir. Pai taküm half century asem yanglur lir aser run timtiba yanglubaji out mesüi run 67 yangluba asütsü.

Pai mezüng 2018 küm MI-i meyipa aruba sülen run asaya 14 nung 512 yanglu. Iba küm pa indang average 36.57 aser strike rate 133 dak tema liasü.

2023 küm pai asaya 16 nung run 605 yanglu. Pa indang average 43.21 aser strike rate 181+ liasü. Iba küm pai century ka aser half century pongu yanglua liasü.

Tendulkar-i 2010 küm mezüngbuba asaya 15 nung run 618 yanglu aser 2011 küm pai asaya 16 nung run 553 yanglua liasü.

Quinton de Kock-ia 2019 aser 2020 küm run 500 mesüra iba dak tema yanglua liasü.

2019 küm pai run 529 yanglu. Pa indang average 35.26 aser strike rate 132 dak tema liasü. Iba sülen 2020 küm pai run 503 yanglu. Iba küm pa indang average 35.92 aser strike rate 140+ liasü aser MI puri IPL ana atonga akokba nung teyari agüja liasü.

India compound archer team Final-i iogo



Monupii/May 7, 2025

(Agencies): World Cup Stage 2 nung India tebur aser tetsür compound archery team-i kanga junga asaya-a Bodhbarnü final-i iogo aser iba asayamung nung India atema medal angbosa angutsü jangjaogo.

No 1 ranked India tebur team nung Ojas Deotale, Abhishek Verma aser Rishabh Yadav nung densema lir, aser parnoki quarterfinal nung Great Britain team 239-232 agi akok aser semifinal nung Denmark team 232-231 agi koka liasü.

Tetsür compound section nung temaba jenjang nung aliba India team nung Madhura Dhamangaonkar, Chikitha Taniparthi aser Jyothi Surekha Vennam nung densema liasü, aser parnoki quarterfinals nung Kazakhstan team akok aser semifinal nung Great Britain koka Mexico den final asayatsü jangjaogo.

Mexico den asayatsü aliba gold medal asaya anaprongla ya Honibarnü asayatsü.

Great Britain den tebur quarterfinal asaya nung India team-i mezüngbuba series 59-60 agi makok saka tanabuba series 60-58 agi koka set ana sülen aggregate score 119-118 aküm.

Tasembuba set nung India team nungi asayartemi kanga junga asaya-a 60-57 agi takok

angu aser set pezübuba-a kasa koka parnoki Great Britain team nung Ajay Scott, Adam Carpenter aser Luke Davis nung koka liasü.

Semifinal nung India team-i asaya junga metenzüktet, kechiyong parnoki mezüngbuba set 57-60 agi makok, saka tanabuba set bo 58-58 ta kasasa liasü.

Tasembuba set tenzükbua mapang nung Denmark team 118-115 agi timba liasü, saka India nung asayartemi kanga junga asaya-a bullseye nung aiben khashi aser kasa mapang nung Mathias Fullerton, Martin Damsbo aser Nicklas Bredal Bryld nung 9s nung asemben khashia point 175-175 ta kasasa aküm.

Set pezübuba nung India-i asaya ya 57-56 agi koka final tongtetogo.

Tetsür compound section nung India team-i quarter nung Kazakhstan 232-229 agi akok aser semifinal nung Great Britain 232-230 agi koka Mexico den final asayatsü jangjaogo.

Toba ita Auburndale (USA) nung India compound mixed team nung Jyothi Surekha Vennam aser Rishabh Yadav nati World Cup Stage 1 nung gold medal ngua liasü. Tenati final nung Chinese Taipei nung Huang I-Jou aser Chen Chieh-Lun na koka liasü.

Kolkata Camp atema coach Manolo team nung Chhetri-a densema lir

Monupii/May 7, 2025

(Agencies): India football team head coach Manolo Márquez-i asayar tejen Sunil Chhetri dak maneni tamang kateta pa taruba ita AFC Asian Cup 2027 Final Round qualifiers atema team shimtsü asoshi asayar 28 shimba nung züngoksemogo.

Arishi küm 40 tain Chhetri ya küm metsü dak tema India team nungi asayaba sülen taoba küm international asaya nungi anisüngzüker liasü, saka pai pa telemtetba melenshia taküm March ita nungi ano asaya tenzükgogo.

Iba sülen pa lenisüba nung India team Maldives den friendly ka asayaogo aser Bangladesh den 2027 AFC Asian Cup qualifiers nunga asayaogo.

"Asayartem ya June ita FIFA International window atema training agitsü asoshi Kolkata nung May 18 nü adenshitsü," ta All India Football Federation (AIFF)-i

Bodhbarnü sangdong ka ajanga metetdaksü.

AFC Asian Cup 2027 Final Round qualifiers nung India team Group C nung Bangladesh, Hong Kong China, aser Singapore den ata lir aser asayatem ya home-and-away round-robin format nung asayatsü.

India team mezüngbuba asaya Hong Kong den June 10 nü Kai Tak Sports Park, Kowloon City nung asayatsü.

Group C nung mezüngbuba asaya anaprongla draw nung tembangba sülen team ajaki point kaka ngur lir. India aser Bangladesh na Shillong nung asaya aser Singapore aser Hong Kong, China na Singapore nung asaya draw nung tembanga liasü.

"Hong Kong den Asian Cup qualifier atema renemshiba nung shilem ka ama Blue Tigers pur Kolkata nung anogo 10 training agitsü aser iba sülen June 4 nü Thailand den FIFA International Friendly ka

asayatsü atema Bangkok-i aotsü. Iba sülen team Asian Cup qualifier atema Hong Kong-i aotsü," ta AIFF sangdong ajangsa metetdaksü.

Kolkata camp atema shimba asayartem:

Goalkeepers: Hrithik Tiwari, Vishal Kaith, Gurmeet Singh Chahal, Amrinder Singh.

Defenders: Naorem Roshan Singh, Rahul Bheke, Konsham Chinglensana Singh, Anwar Ali, Thangjam Boris Singh, Sandesh Jhingan, Asish Rai, Subhasish Bose, Mehtab Singh, Tekcham Abhishek Singh, Nikhil Prabhu. **Midfielders:** Suresh Singh Wangjam, Naorem Mahesh Singh, Ayush Dev Chhetri, Udanta Singh Kumam, Lalengmawia Ralte, Liston Colaco, Ashique Kuruniyan, Brandon Fernandes.

Forwards: Sunil Chhetri, Irfan Yadwad, Manvir Singh, Suhail Ahmad Bhat, Lallianzuala Chhangte.

Head Coach: Manolo Márquez.

Taipei Open: Srikanth, Tharun, Unnati tanabuba round-i iogo

Monupii/May 7, 2025

(Agencies): Tang asaya aliba Taipei Open Super 300 Badminton Tournament nung Bodhbarnü India nung badminton asayar Kidambi Srikanth-i asayamung kanga junga tenzüka straight game nung asaya kokogo, aser pa den tanoburtema kari asaya koka tanabuba round tongtetogo.

World No. 61 Srikanth, shiba joko mapang talangka junga masayateti arudar pai külem India nung asayar Sankar Subramanian 21-16 21-15 agi koka tanabuba round-i iogo. Sankar ya 2022 world junior championships silver medallist lir.

Arishi küm 32 tain 2021 World Championships silver-medallist ya tanabuba round nung India nung asayarsa Ayush Shetty den asayatsü.

Ayush, shiba Orleans Masters semifinal tonga asayaogo, pai mezüngbuba round nung kanga junga asaya-a Chinese Taipei nung third seed aser world number 13 Lee Chia Hao 21-17 21-18 agi koka liasü. Chia-hao ya March ita All England Championships nung runner-up liasü.

2023 National Games gold-medallist Tharun Mannepalii-ia kanga junga asayaogo aser pai Japan nung asayar Shogo Ogawa 21-17 19-21 21-12 agi

kokogo. Pa tanabuba round nung Indonesia nung asayar Moh. Zaki Ubaidillah den asayatsü.

Ajisüaka Meiraba Luwang Maisnam bo tia maka Canada nung Brian Yang-i 21-23 12-21 agi tsükdaktsüogo.

Tetsür kija asaya nung Unnati Hooda-i külem India tsür Anupama Upadhyaya 21-13 21-17 agi akok aser la taruba round nung Taipei tsür Lin Sih Yun den asayatsü. Hooda-i tang tashi nung 2022 Odisha Masters aser 2023 Abu Dhabi Masters ta super 100 titles ana bener lir.

Ajisüaka Aakarshi Kashyap bo 9-21, 12-21 agi Taipei tsür Hung Yi-Ting-i kokogo.

BENDANGLI OSANG : Tapak 7 nungi...

Ceasefire atema nangzüktepba...

Iba telok yagisa rongtem amak tenzüksütsü nangzükgogo aser ibayongji US military-i parnok anogoshia amai maka aruogo.

Ajisüaka iba tenangzüktepba yangluba indang sangdongba mapang Trump-i Honibarnü ashiba agi, Houthis puri joko ojang dang raraner.

"Onoki iba ya akümtsübuttsü aser bomb pokloktsüba anentsü aser parnokia onok

anema inyakba anenogo," ta pai shisem.

Ajisüaka Abdulsalam-i ashiba agi, tenangzüktepba yangluba sülena US-i jenjang agira parnoki telangzüba agütsütsü. "America nung tsükchirtemi makra onokia amak tenzüksü," ta pai ashi.

Kasa mapang nung Houthi political lenir Mahdi al-Mashat-i ashiba agi, parnoki Israel-i metizüktettsüsa Israel maneni amaktsü.

BILEMDANGANG

"Timtem tekangshi ajanga oya lira anena makazüi maneni dang oang."